

Wakalah zakat KPM bantu murid asnaf

PPZ-MAIWP serah wakalah zakat berjumlah lebih RM1 juta kepada KPM

Oleh **NURUL HUDA HUSAIN**
SHAH ALAM

Pusat Pungutan Zakat-Majlis Agama Islam Wilayah Persekutuan (PPZ-MAIWP) menyerahkan wakalah zakat berjumlah RM1,096,698 kepada Kementerian Pendidikan Malaysia (KPM) dalam majlis yang berlangsung di Auditorium Kompleks E, Putrajaya pada Isnin.

KPM menerusi satu kenyataan berkata, pelaksanaan majlis tersebut sebagai penghargaan kepada seluruh warga kementerianya

yang menunaikan kewajipan berzakat terutamanya zakat pendapatan.

“Kempen Skim Potongan Zakat Bulanan adalah satu langkah proaktif Kementerian bagi memberikan kesedaran buat seluruh warga KPM untuk menunaikan zakat pendapatan.

“Wakalah adalah dasar pengembalian wang zakat oleh Majlis Agama Islam Wilayah Persekutuan kepada entiti yang membayar zakat kepada PPZ-MAIWP yang kemudiannya diagihkan kepada asnaf yang layak.

“Setakat ini, wakalah zakat adalah berjumlah RM1,096,698 yang akan diserahkan kepada KPM bagi tujuan pengagihan. Jumlah keseluruhan kutipan zakat KPM pada tahun 2022 adalah sebanyak RM8,773,587,” kata kenyataan itu pada Isnin.

Dalam majlis sama turut diadakan Sumbangan Zakat Murid Asnaf Putrajaya oleh Etiqa Family Takaful Berhad.

Yayasan Didik-Negara (YDN) diberi tanggungjawab sebagai



Fadhlina (tengah) menyaksikan penyerahan zakat oleh PPZ-MAIWP di Putrajaya pada Isnin.

peneraju utama inisiatif itu yang menyelaras keseluruhan peruntukan bagi memastikan agihan cekap, teratur dan sistematis.

Menurut KPM, ia termasuk pengagihan peruntukan zakat kepada murid asnaf di Putrajaya berjumlah RM113,500 yang

melibatkan seramai 1,135 orang murid hasil sumbangan Etiqa Family Takaful Berhad.

Sementara itu, Menteri Pendidikan, Fadhlina Sidek dalam ucapannya memberi penekanan terhadap kepentingan institusi zakat yang dapat membantu menangani isu ke-

miskinan multidimensi dalam kalangan murid.

Jelasnya, langkah tersebut juga selari dengan hasrat untuk menoktahkan kemiskinan dan menyeru komitmen serta kerjasama semua pihak termasuk memperkukuhkan ekosistem institusi zakat.